

KANTONALNA
PRIVREDNA
KOMORA TUZLA,
BROJ 6 i 7
juni/juli
2013. GODINE



KOMORSKI INFORMATOR

15 uspješnih godina...



15 godina MI
"MENPROM" TUZLA



SPORAZUM O SARADNJI
POSLODAVACA I KO-
MORE



"NACRT ZAKONA O
NAFTNIM DERIVATIMA
I KOMORE"



30 GODINA ZZ
"GRAČANKA"

**KOMORSKI
INFORMATOR
broj 6 i 7 -juni/juli 2013.**

**KANTONALNA
PRIVREDNA
KOMORA TUZLA**

Izdavački savjet:

1. Nedret Kikanović, predsjednik
2. Mirsad Kukić, član
3. Bajazit Jašarević, član
4. Suad Selimović, član
5. Nurdin Žunić, član

Redakcijski kolegij:

1. Nedret Kikanović, član
2. Esad Arnautović, član
3. Nurudin Žunić, član
4. Suad Selimović, član

Izdavač:

Kantonalna privredna komora Tuzla

Gl i odgovorni urednik:

Dino Kalesić, dipl. žurnalista

Tehnička priprema, repro i štampa

C.P.A. Tojšići- Kalesija

Za štampariju:

Vildan Uščuplić - generalni direktor

Tiraž:

500 primjeraka,

Adresa:

Trg slobode bb
e-mail: komora@kpkt.ba
http://www.kpktz.ba

Ministarstvo obrazovanja, nauke, kulture i sporta na osnovu Člana 19. tačka 13. stav 2. Zakona o porezu na promet proizvoda i usluga ("Sl. novine Federacije Bosne i Hercegovine", broj: 6/95 i 25/97), rješavajući o zahtjevu Kantonalne privredne komore Tuzla broj: 10/15-4481/99. od 30.04.1999. godine, dalo je mišljenje o oslobađanju poreza na promet glasila "Komorski informator".

Poštovani čitaoci!

Komorski informator u ovom broju donosi informacije o jubilejima u dva subjekta. Mesna industrija "Menprom" Tuzla bilježi 15 godina uspješnog rada. Brojne su nagrade, medalje i priznanja za proizvode iz "Menproma", posebno su značajne medalje sa ovogodišnjeg sajma u Novom Sadu, u godini jubileja za proizvode iz nove proizvodne linije. Zemljoradnička zadruga "Gračanka" obilježava 30 godina rada i postojanja.



Predstavnici Kantonalne privredne komore Tuzla i Udruženja poslodavaca u Tuzlanskom kantonu potpisali su Aneks Sporazuma o saradnji. Ovim Aneksom Sporazuma uređuju se međusobni odnosi i saradnja između Komore i Udruženja na planiranju i realizaciji zajedničkih aktivnosti a sve u cilju stvaranja povoljnijih uslova privređivanja i obezbjeđenja dinamičnijeg privrednog razvoja Tuzlanskog kantona.

Ministarstvo za trgovinu, turizam i saobraćaj Tuzlanskog kantona u saradnji sa JP „MAT“ Tuzla i Kantonalnom privrednom komorom



Tuzla, upriličilo je u Komori prezentaciju potencijala "Međunarodnog aerodroma Tuzla". Sa ciljem daljnjeg razvoja i promocije potencijala "Međunarodnog aerodroma Tuzla" privrednicima sa područja Tuzlanskog kantona i svim drugim zainteresovanim subjektima, prezentovana je informacija o dosadašnjim ulaganjima u razvoj JP "Međunarodni aerodrom Tuzla".

Kantonalna privredna komora Tuzla u saradnji sa Federalnim ministarstvom energije, rudarstva i industrije organizovala je raspravu na temu "Nacrt zakona o naftnim derivatima u Federaciji Bosni i Hercegovini".

Predstavili smo novosti u radu firmi članice Komore, Bosna Niless d.o.o. Lukavac, "Vatrostalac" Tuzla, hote "Tehnograd" Tuzla.

Odbor Udruženja za poljoprivredu i prehrambenu industriju Kantonalne privredne komore Tuzla, održao je 7. sjednicu u proširenom sazivu a zasjedali su i članovi Odbora Sekcije za unutrašnji prijevoz putnika, pri Udruženju za promet i komunikacije Kantonalne privredne komore Tuzla.

I u ovom periodu smo zabilježili nekoliko učlanjenja u Komoru, među kojima bilježimo i želju da budu dio porodice firmi članica Komore miz Salona ljepote i zdravlja „Belladona" Tuzla. List donosi i nekoliko informacija o aktivnostima Vlade Tuzlanskog kantona vezano za privredne prilike...

Kantonalna privredna komora Tuzla je u junu izgubila kolegu i prijatelja, dugogodišnjeg komorskog radnika Jorgovana Begića.

Dino Kalesić
gl. i odg. urednik

Posljednji pozdrav...

U četvrtak 13. juna 2013. godine u 64. godini života, preminuo je Jorgovan Begić, dopredsjednik Kantonalne privrede komore Tuzla.



Jorgovan Begić
(20.06.1949.-13.06.2013)

KOLEKTIV KANTONALNE PRIVREDNE KOMORE TUZLA


SADRŽAJ:

	POTPISAN ANEKS SPORAZUMA O SARADNJI	5
	PREGOVORI O NOVIM AVIO LINIJAMA	6
	"NACRT ZAKONA O NAFTNIM DERIVATIMA U FBiH"	7 i 8
	"BOSNA NILESS" D.O.O. LUKAVAC	9
	15 GODINA MI "MENPROM" TUZLA	10 i 11
	"VATROSTALAC" D.O.O. TUZLA	13
	ZNAČAJAN JUBILEJ ZZ "GRAČANKE"	15
	SALON LJEPOTE I ZDRAVLJA "BELLADONA" TUZLA	19

HERCEG
SREBRENICA
30
GODINA
TRADICIJE
1983-2013

HERCEG
PVC i Al prozori i vrata

www.dooherceg.com



**Štedimo energiju,
čuvajmo okolinu!**

TROCAL®



Komora i Udruženje poslodavaca u TK

POTPISAN ANEKS SPORAZUMA O SARADNJI

-Zajednički stvarati povoljni poslovni ambijent-



Predstavnici Kantonalne privredne komore Tuzla i Udruženja poslodavaca u Tuzlanskom kantonu, Nedret Kikanović i Vinko Ćuro, potpisali su Aneks Sporazuma o saradnji. Ovim Aneksom Sporazuma uređuju se međusobni odnosi i saradnja između Komore i Udruženja na planiranju i realizaciji zajedničkih aktivnosti a sve u cilju stvaranja povoljnijih uslova privređivanja i obezbjeđenja dinamičnijeg privrednog razvoja Tuzlanskog kantona. Kako je i istaknuto u Komori prilikom potpisivanja ovog dokumenta, u narednom periodu će se dogovoriti zajedničke aktivnosti i precizirati dinamika njihove realizacije kako bi se što prije pristupilo stvaranju povoljnijeg poslovnog ambijenta, kako bi se u što većoj mjeri i na što efikasniji način, bilo na usluzi privredi i kako bi privrednim subjektima ove Komora i Udruženje bili što kvalitetniji servis. **“Neophodno je da se pokrenu aktivnosti na stvaranju povoljnijeg ambijenta u Tuzlanskom kantonu za poslovanje privrede. Moramo se posvetiti efikasnijem otklanjanju barijera u odvijanju biznisa, posvetiti se razvoju partnerskih odnosa sa državnim organima u pripremi i donošenju zakona, strategija razvoja, sektorskih ekonomskih politika, zaštite domaće proizvodnje, uspostavljanju sistema ekološki održivog razvoja, razvoja i unapređenja institucija tržišta i drugih pitanja od značaja za privredu. Privredi Tuzlanskog kantona treba kvalitetnija i efektivna promocija kako na području Tuzlanskog kantona i BiH tako i na inostranim tržištima. Mi smo u Komori i do sada imali praksu a u narednom periodu ćemo je nastaviti i u saradnji sa Udruženjem poslodavaca i unaprijediti, kada su u pitanju organizovanja i provođenja edukacija i treninga, iniciranja izrade istraživačkih i razvojnih projekata koji imaju poseban značaj za društveno-ekonomski razvoj Tuzlanskog kantona, obezbjeđivanju svih resursa koji mogu doprinijeti efikasnijem i produktivnijem poslovanju poslovnih subjekata sa ovog područja. Značajno je još reći da od**

ovog čina potpisivanja dokumenta, svi privredni subjekti sa područja Tuzlanskog kantona koji žele biti članovi jedne od asocijacija – potpisnica Aneksa Sporazuma, automatski postaju i članovi druge asocijacije – potpisnice Aneksa Sporazuma. To se odnosi i na aktuelne članice asocijacije – potpisnica Aneksa Sporazuma”, izjavio je Nedret Kikanović predsjednik Kantonalne privredne komore Tuzla. Potpisivanje Aneksa Sporazuma, kao znak početka kvalitetnije saradnje Komore i Udruženja poslodavaca, kroz realizaciju planiranih aktivnosti doprinijet će i efektivnijem i racionalnijem radu potpisnica. Dogovoreno je da se saradnja u narednom periodu odvija putem zajedničkih sastanaka i konsultacija organa i stručnih tijela Komore i Udruženja poslodavaca. **“Mi smo u Udruženju poslodavaca opredjeljeni da sarađujemo sa Komorom, da zajednički pokušamo dati doprinos razvoju privrede i prilika u kojima privredni subjekti posluju. Također, zajednički ćemo nastupati i usaglašavati stavove prilikom utvrđivanja Programa rada Ekonomsko-socijalnog vijeća TK. Naši i predstavnik Komore će kao jedinstvena delegacija zatupati naše privrednike a sve u cilju ostvarenja uspješnije koordinacije u radu i snažnijeg predstavljanja interesa privrede”,** rekao je Vinko Ćuro v.d. predsjednika Udruženja poslodavaca u Tuzlanskom kantonu, nakon potpisivanja Aneksa Sporazuma o saradnji Kantonalne privredne komore Tuzla i Udruženja poslodavaca u Tuzlanskom kantonu.

D.K.



Prezentacija MAT-a u Komori...**PREGOVORI O NOVIM AVIO LINIJAMA****- Privrednicima prezentiran potencijal Međunarodnog aerodroma Tuzla -**

Ministarstvo za trgovinu, turizam i saobraćaj Tuzlanskog kantona u saradnji sa JP „MAT“ Tuzla i Kantonalnom privrednom komorom Tuzla, upriličilo je u Komori prezentaciju potencijala „Međunarodnog aerodroma Tuzla“. Sa ciljem daljnjeg razvoja i promocije potencijala „Međunarodnog aerodroma Tuzla“ privrednicima sa područja Tuzlanskog kantona i svim drugim zainteresovanim subjektima, prezentovana je informacija o dosadašnjim ulaganjima u razvoj JP „Međunarodni aerodrom Tuzla“. Menadžment „Međunarodnog aerodroma Tuzla“ je prezentovao informaciju o otvaranju novih linija za Bazel, Malme i Geteborg sa avio kompanijom Wizz air a istaknuto je i kako se vode pregovori i o otvaranju novih avio linija, za destinacije prema Njemačkoj i drugim zemljama Evrope. U posebno pripremljenoj prezentaciji, menadžment JP „Međunarodni aerodrom Tuzla“ je detaljno predstavio nove mogućnosti i šanse poslovanja za privrednike Tuzlanskog kantona, nove mogućnosti i šanse za ulaganja na ino tržišta Švicarske, Francuske, Njemačke i Švedske te evropskih zemalja sa kojima postoje otvorene direktne avio linije sa Međunarodnog aerodroma Tuzla. **„Cilj aktivnosti, koje su zajednički vodili Aerodrom, Ministarstvo i Vlada Tuzlanskog kantona u cjelini, u proteklih 6 godina, kako bi smo doveli Wizz air u Tuzlu, je privredni, društveni, kulturni i ukupni društveni razvoj Tuzlanskog kantona ali i cijele regije. Naš primarni cilj nije direktna ekonomska dobit Aerodroma, nego pružanje prilike za kvalitetniji razvoj privrede, turizma i sl“,** rekao je ministar trgovine turizma i saobraćaja Senaid Hadžić, te dodao da je prezentacija bila prilika da privrednici iskažu svoj interes kako za trenutno postojeće linije ali i eventualno nove destinacije koje bi se mogle otvarati sa aerodroma u Tuzli. Ovom prilikom Mensud Brčaninović, Rukovodilac sektora saobraćaja i tehnike je prisutnim



privrednicima predstavio i destinacijske aerodrome te njihovu putnu i drugu infrastrukturnu povezanost za okolnim gradovima i turističkim i industrijskim centrima, te izrazio nadu i očekivanje da će iskorištavanjem mogućnosti ovih relativno jeftinih avio linija privrednici sa područja Tuzlanskog kantona ostvariti nove ili učvrstiti postojeće poslovne veze, saopćeno je iz Odjeljenja za informisanje Vlade Tuzlanskog kantona. Treba pomenuti da je kompanija Wizz Air na relaciji Geteborg - Tuzla - Geteborg, obavlja letove dva puta sedmično, svakog ponedjeljka i petka. Slijetanje aviona na Međunarodni aerodrom Tuzla je u 12.15 sati a polijetanje u 12.45 sati. Letovi na relaciji Bazel - Tuzla - Bazel obavljaju se dva puta sedmično, svake subote i utorka. Po redu letenja, slijetanje aviona na Međunarodni aerodrom Tuzla je u 19.15 sati, a polijetanje u 19.45 sati. Na relaciji Malmo - Tuzla - Malmo, Wizz Air leti tri puta sedmično. Osim ponedjeljkom i petkom, letovi se obavljaju i srijedom po ustaljenom redu letenja - slijetanje na Međunarodni aerodrom Tuzla u 19.20 sati, a polijetanje u 19.50 sati, saopćeno je iz Ureda za zajedničke poslove kantonalnih organa Tuzlanskog kantona. O Međunarodnom aerodromu Tuzla raspravljali su i članovi Vlade TK na redovnom zasjedanju. Prihvaćen je Izvještaj o poslovanju, Izvještaj o radu Nadzornog odbora u prošloj godini te Plan poslovanja JP „Međunarodni aerodrom Tuzla“ d.o.o. za 2013. godinu. Plan je načinjen na osnovu izvještaja o poslovanju iz prethodnog perioda, procjeni realizacije započetih aktivnosti u ranijim godinama te procjeni realnih mogućnosti razvoja Aerodroma nakon pregovora sa potencijalnim partnerima. Okvir ovogodišnjih planskih potreba ne izlazi iz okvira trogodišnjeg plana investicija a koji je sadržan u dokumentu okvirnog Budžeta TK. U toku ove godine očekuje se da će biti prevezeno više od 60 000 putnika sa ovog aerodroma.

D.K.



Obavljena rasprava u Komori...

"NACRT ZAKONA O NAFTNIM DERIVATIMA U FBiH"

- *Nacrt Zakona može poslužiti kao osnova za izradu prijedloga Zakona* -



Kantonalna privredna komora Tuzla u saradnji sa Federalnim ministarstvom energije, rudarstva i industrije organizovala je raspravu na temu "Nacrt zakona o naftnim derivatima u Federaciji Bosni i Hercegovini". Trenutno stanje u naftnom sektoru u Federaciji Bosne i Hercegovine karakteriše činjenica da postojeća legislativa ne prepoznaje naftne derivate kao stratešku sirovinu. Pozitivni zakonski propisi, takođe, ne definišu učesnike u tržištu naftnih derivata, njihovih prava i obaveza u smislu učesnika na ovom tržištu. Predstavnički dom i Dom naroda Parlamenta Federacije BiH, prilikom razmatranja Nacrta zakona o naftnim derivatima u Federaciji BiH, usvojili su zaključke kojim je utvrđeno da predmetni Nacrt Zakona može poslužiti kao osnova za izradu prijedloga Zakona. Ovaj potez treba posmatrati u skupu ispunjavanja međunarodnih obaveza BiH koji proističu iz potpisanog Ugovora o stabilizaciji i pridruživanju i Ugovora o osnivanju Energetske zajednice, kojim je Bosna i Hercegovina preuzela međunarodnu obavezu formiranja obaveznih rezervi naftnih derivata, radi osiguranja opskrbe ključnih postrojenja, kao i provedbe adekvatnih reakcija na vanjske ili unutarnje poremećaje u opskrbi. Ovaj zakonski akt je i potreba Federacije BiH u osiguranju stabilnog snabdijevanja naftnim derivatima koje podrazumijeva uspostavu sistema osiguranja obaveznih naftnih rezervi i centralno upravljanje njima što je ključni element sistema interventnog reagiranja. Nacrtom zakona se prvi put definišu odnosi na tržištu, uređuju strategija i politika razvoja naftnog sektora, strateški i akcioni plan razvoja naftnog sektora, usklađivanje planova, bilans naftnih derivata, energetske djelatnosti u sektoru naftne privrede, uslovi i način obavljanja energetske djelatnosti, uvoz naftnih derivata, dostavljanje podataka, regulisanje naftnog

sektora, nadležnosti i obaveze Regulatorne komisije FBiH, energetska dozvola, sadržaj i način njenog izdavanja, registar ovih dozvola, sigurno snabdijevanje tržišta naftnim derivatima i njihova cijena, naknada za uspostavu rezervi naftnih derivata i njihov kvalitet, označavanje pumpnih automata, kontrola kvaliteta, obim monitoringa za goriva nižeg kvalitetnog nivoa, stavljanje u promet LPG u bocama, operativne i obavezne zalihe, rezerve naftnih derivata, Operator rezervi naftnih derivata (Terminali FBiH), kao i njegova djelatnost, te upravni i inspekcijski nadzor. Značaj ovog zakonskog akta je i u činjenici da Federacija BiH nema proizvodnih kapaciteta i isključivo ovisi o uvozu derivata nafte, odnosno međuentitetskoj trgovini, pa je ovo tržište jako osjetljivo na sve poremećaje u snabdijevanju. Postojeće zalihe naftnih derivata regulisane su Zakonom o federalnim robnim rezervama (bez posebnog izdvajanja od svih ostalih roba) i ne zadovoljavaju ni minimalne potrebe Federacije BiH. Postupajući u skladu sa navedenim zaključcima, a s ciljem što kvalitetnijeg teksta Prijedloga zakona o naftnim derivatima u Federaciji BiH, Federalno ministarstvo za energiju, rudarstvo i industriju je tekst Nacrta zakona objavilo na službenoj web stranici ovog Ministarstva (www.fmeri.gov.ba), čime je isti postao dostupan najširem krugu zainteresovanih lica, koja imaju mogućnost da na adresu ovog Ministarstva dostave eventualne primjedbe i sugestije, a koje će biti uzete u razmatranje prilikom sačinjavanja Prijedloga zakona. I rasprava u Kantonalnoj privrednoj komori Tuzla, bila je prilika privrednicima sa područja Tuzlanskog kantona da iznesu svoje stavove vezane za ovu problematiku te daju prijedloge za određene izmjene i dopune dokumenta "Nacrt zakona o naftnim derivatima u Federaciji Bosni i Hercegovini".



Nakon što je Armin Đuliman iz Ministarstva za energetiku, rudarstvo i industriju FBiH prezentovao Nacrt Zakona o naftnim derivatima u Federaciji Bosne i Hercegovine, u raspravi su iznesene određene primjedbe i prijedlozi:

- ❖ Ukoliko se u svrhu kontrole kvaliteta obavi uzorkovanje goriva i nalaz bude uredan, troškove uzorkovanja treba da snosi Vlada, odnosno da se troškovi pokriju iz budžeta, a ukoliko se ustanovi da kvalitet goriva ne odgovara standardima onda treba da se primijene kaznene odredbe koje treba ispoštovati da li kao novčane kazne ili zatvaranje pumpe;
- ❖ Prilikom uvoza goriva, odnosno ulaska cisterne iz Hrvatske, ako gorivo nije zadovoljavajućeg kvaliteta u skladu sa važećim standardima, tržišna inspekcija ne bi trebala da pusti takvu cisternu u državu;
- ❖ Da se predloženi tekst Nacrta zakona o naftnim derivatima F BiH uskladi sa zakonodavstvom EU, budući da nisu preuzete mnoge odredbe evropskog zakonodavstva, što znači da ćemo kroz nekih 5 godina morati preuzimati odredbe koje su u skladu sa evropskih zakonodavstvom;
- ❖ Treba razmotriti uvođenje naknade od (još) jednog feninga po litru goriva, jer to može dodatno povećati cijenu i time smanjiti konkurentnost,
- ❖ Treba razmotriti opravdanost odluke o zaokruživanju na 5 feninga po litri prodanog goriva jer je to dodatno opterećenje za privredu, te su distributeri iz F BiH u neravnompravnom položaju u odnosu na distributere iz RS
- ❖ Član 11. stav (2) tačka a), b), c) treba da se izbriše ili izmjeni jer obezbjeđenje vlastitog ili iznajmljenog rezervoara – skladišta po svakom derivatu nije opravdano. Ovim se sprječava ili onemogućava većini distributera da se mogu i dalje baviti prometom naftnih derivata, odnosno bavit će se samo manji broj firmi.
- ❖ U članu 29. treba mijenjati administrativno određivanje najviše cijene, jer u konačnici to bi moglo dovesti to toga da se male firme ne mogu baviti distribucijom,
- ❖ Član 30. treba izmijeniti, odnosno predlaže se da se naknada za uspostavu rezervi naftnih derivata plaća pri uvozu i plaćao bi je uvoznik, jer bi se u ovom slučaju morali mijenjati informatički sistemi što iziskuju velike troškove za distributere;
- ❖ U članu 34 tačku (4) treba definisati na način da ako distributer ima potpisan ugovor sa nekom od ovlaštenih kontrolnih kuća, a u kontrolu dođe druga kontrolna kuća, po programu Ministarstva, da se kontrole ne dupliraju, jer je bilo slučajeva da je došla kontrola od strane inspekcije koje je imala uređaje dobijene od određenih distributera u BiH, što je svojevrsni sukob interesa budući da se pokazalo da u većini slučajeva kad je kontrola kvaliteta goriva vršena tim instrumentima kao nije bilo

dobro niti odgovarajućeg kvaliteta ako nije nabavljeno od distributera čiji su uređaji u upotrebi kod inspekcijskih organa;

- ❖ Da se u Zakonu formuliše formiranje regulatornog organa, definira energetska dozvola i uvjeti po kojima se može dobiti;
- ❖ U članu 8. se mora tačno definisati bilansa naftnih derivata, odnosno stiče se dojam da je opskrba još uvijek državni posao i u državnim rukama;
- ❖ U članu 30. gdje se govori o izdavanju objekata i zaštititi okoline Zakon se veže na federalnu zakonsku regulativu, a zaštita čovjekove okoline je podjeljena na nadležnosti kantona i Federacije, odnosno moraju se poštovati i odnosni kantonalni zakoni, što ovdje nije slučaj;
- ❖ U Zakonu se govori o sadržaju energetske dozvole i da je definira regulator odnosno regulatorna komisija. Međutim, Zakon bi trebao da definira dobijanje energetske dozvole, postupak, procedure i mora se tačno znati za koji period se dozvola izdaje,
- ❖ Vezano za energetske dozvolu treba precizno definirati potreban broj zaposlenih, na koga se odnosi, šta mora imati, odnosno mora se tačno znati šta sve trebaju obezbijediti kako bi se dobila energetska dozvola;
- ❖ U članu 23. gdje se govori o oduzimanju energetske dozvole potrebno je uvrstiti kršenje carinskih propisa zatim neizmirenje poreskih obaveza, kršenje ekoloških obaveza i propisa;
- ❖ Treba strogo razdvojiti nadležnosti regulatorne komisije i inspekcije, a ne da kontrolišu istu stvar (kod onih koji se bave ovom djelatnošću);
- ❖ Što se tiče kakvoće naftnih derivata postoji kompromis između Federacije i RS, ali treba u Zakonu navesti koji je rok odluke i u članu 31. se mora navesti ako se radi o domaćoj proizvodnji da li je to do „5 godina“, kako se ne bi radili aneksi i izmjene zakona ako se ne stvore uslovi do tog roka.
- ❖ U članu 32. i 33. treba decidno definisati šta je to niži kvalitet goriva.

D.K.






Predstavljamo članice Komore...

"BOSNA NILESS" D.O.O. LUKAVAC

- *Sa novim tehnološkim mogućnostima i opremom koju trenutno posjeduju, "Bosna Niless" d.o.o. Lukavac postaje ravnopravan partner ostalim firmama -*



Firma Bosna Niless d.o.o. Lukavac formirana je 1996. godine u 100% privatnom vlasništvu. Zijad Burgić inače dipl.ing.maš. direktor je firme iz kojeg je bogati staž u tuzlanskoj TTU, Tvornici transportnih uređaja. Iskustva i znanja stečena u ovom nekadašnjem gigantu, pretočena su u firmu "Bosna Niless" čija je primarna djelatnost proizvodnja, remont i servis mašina i uređaja. **"Razvoj firme tekao je postepeno i danas posjedujemo sopstveni proizvodni prostor od 650 m², mašinski park sa tokarskim strojevima, glodalicama, horizontalna bušilica – Borverk, CNC tokarilica, radijalne bušilice, mašine za izradu zupčanika sa vanjskim i unutrašnjim ozubljenjima, brusilice, prese i ostali alat. Kao firma za generalne remonte bagera, drobilničnih postrojenja, pogonskih strojeva, generalne remonte, obradu i montažu reduktora do 1500W, sigurno smo među vodećim u BiH kako u tehničkom tako i u stručnom pogledu. Naš visokostručni kadar čine mašinski inženjeri, internacionalni inženjer zavarivanja (IWE), mašinski tehničari, VKV bravari, metalostrugari, metaloglodači, KV zavarivači, CNC operateri, kao i ekonomska služba. Prošle godine u firmi je uspostavljen sistem upravljanja kvalitetom prema zahtjevima standarda ISO 9001. Za spomenuti standard dobili smo i certifikat ISO 9001:2008., a u 2013. godini uspješno je izvršen nadzorni audit. Naši krajni korisnici su sve firme koje posjeduju proizvodni program, mašine i uređaje, mehaničkog i automatizovanog procesa proizvodnje, a kojima je potreban remont mašina i uređaja, kao i njihovo održavanje",** istakao je direktor Burgić.

Prilika je ovo da se pomenu neki od kranjih korisnika usluga, poslovni partneri firme kojima se direktor Burgić zahvaljuje i na saradnji i na povjerenju. Redom su to značajni privredni subjekti među kojim se nalaze Fabrika cementa Lukavac, Fabrika sode Lukavac, Rudnici "Kreka" u Tuzli, Rudnik krečnjaka "Vijenac" Lukavac, Xella BH, JP Elektroprivreda BiH odnosno Termoelektana Tuzla i Elektrodistribucija Tuzla. Do sada je firma izradila niz izuzetno složenih

i skupih projekata. **"Radili smo na remontima i izradi reduktora do 1500 kW, generalnim remontima bagera, drobilničnih postrojenja, montaži opreme mašina za željezare (montaža preko 500t opreme u TRD Vareš), izrada potpuno novih reduktora. 2011. godine firma je postala članica Konzorcija metalske industrije Tuzlanskog kantona, što nam je omogućilo poboljšanje rada firme i veću konkurentnost na tržištu. Orjentacijom firme od samog osnivanja možemo se prilagoditi svim uslovima tržišta, a pravilno vođenom politikom razvoja imamo i zavidnu tehničku opremljenost, i ono što je najznačajnije, zaposlene radnike sa izuzetnim stručnim potencijalom. Zbog ovakvog rada dobijamo sve hitne poslove i brze intervencije, kompletne generalne remonte i održavanje mašina na godišnjem nivou",** dodao je direktor Zijad Burgić.

Kako je istakao za Komorski informator, planovi menadžmenta idu u daljem smjeru na nabavku mašina za cikopaloidno ozubljenje sistemom Klingenberg, većih karusel strojeva, a samim tim i ulaženje u kooperativni odnos sa većim evropskim firmama na polju prenosnika. Paralelan razvoj izrade dijelova i obrada i montaža sa proširivanjem broja zaposlenih i formiranjem projektnog biroa, omogućava ovoj firmi stabilan rad u narednom periodu, čime bi postigli puni efekat u kontinuiranom otvaranju novih radnih mjesta, edukacije zaposlenika i povećanje konkurentnosti firme. Sa novim tehnološkim mogućnostima i opremom koju trenutno posjeduju, "Bosna Niless" d.o.o. Lukavac postaje ravnopravan partner ostalim firmama, a zbog svoje lake tržišne i ekonomske prilagodljivosti korisnicima, mogli bi se naći među firmama koje mogu zaključiti ugovore za generalne remonte ili održavanje mašina na godišnjem nivou.

D.K.





Nagrade za kvalitet u godini jubileja...

15 GODINA MI "MENPROM" TUZLA

- Dvije medalje iz Novog Sada - "Menpromu" zlatna i srebrna medalja – Treća fabrika za unuke – Želja: postavljanje novih standarda kvaliteta proizvoda -



Nekako su kao po pravilu nagrade i priznanja, na jednom od najpriznatijih sajmova u regiji kada je u pitanju poljoprivreda i prehrambena industrija, rezervisane za proizvode iz MI "Menprom" Tuzla. Posebno su značajna i draga u godini jubileja. Podsjetimo, na nedavno završenom 80. Međunarodnom poljoprivrednom sajmu u Novom Sadu, MI "Menprom" je zaslužila još dvije medalje. Ovoga puta, medalju su zaslužili za novu liniju proizvoda, za konzervirane proizvode. Goveđi narezak Premi osvojio je zlatnu a kokošiju pašteta Pollo je osvojila bronzanu medalju. Ova dva proizvoda „Menproma“ dobila su nagradu u kategoriji ocjenjivanja kvaliteta u robnoj grupi „Meso i proizvodi od mesa“. Ovim priznanjima se nastavlja tradicija osvajanja medalja za kvalitet proizvoda kompanije Menprom, koja je i prethodnih godina na Međunarodnom sajmu poljoprivrede u Novom Sadu osvajala medalje - zlato za pileći parizer Pollo, bronzu za pileću hrenovku Pollo, zlato za Premi bosanski pršut i srebro za Premi goveđi kulen. Sve su velike, sve su značajne, ali će se posebno pamtiti ove posljednje. Osvojenu su za novu, veoma kvalitetnu liniju proizvoda i to u godini kada se obilježava 15 godina uspješnog rada MI "Menprom" Tuzla. Kao logički slijed događaja jeste i razgovor sa čovjekom koji je došao na ideju pokretanja mesne industrije, realizovao je i još uvijek daje puni doprinos usavršavanju proizvodnje, novim linijama, udara čvrste temelje fabrike kojoj će djeca i unuci nastaviti tradiciju. Posjetili smo u novim prostorima, u novoj fabrici Mensura Alića direktora i vlasnika MI "Menprom" Tuzla.

K.I. – Kako su "Menpromu" dočekanе nove medalje?

"Veliki je značaj ovih medalja. Nas su i do sada radovale medalje iz Novog Sada i sa drugih sajmova, bile su nam dokaz kvalitetnog i ispravnog rada, držale su nam vjeru da idemo pravim putem ali su ovogodišnje medalje za nijansu značajnije. Prvo, radi se o novim proizvodima koji su na tržištu prisutni tek od januara ove godine, a već smo uspjeli dostići vrhunski kvalitet, koji je, osim od naših potrošača, dobio i potvrdu od jednog od najjačih regionalnih sajmova poljoprivrede, a to je Novosadski sajam. Ovakva priznanja pokazuju da se uporan rad i rad na kvalitetu proizvoda, od čega mi u „Menpromu“

ne odustajemo ni u vrijeme kada se na tržištu nudi sve i svašta, ipak isplati. S druge strane, mi ove godine obilježavamo 15 godina naše industrije, pa su zaslužene nagrade uveličale naš jubilej."

K.I. - Posebna je i receptura, aroma, uopšte pristup novoj liniji proizvoda.

"Dugo godina i ja lično koristim ovakve proizvode, dugo godina sam u trgovini, mesnoj industriji i zaista, bez imalo lažne skromnosti, mogu reći da posjedujem i znanje a i iskustvo o tome kakvi proizvodi trebaju biti. Veoma je teško postići kvalitetne proizvode sa kvalitetnom aromom na koju su kupci godinama navikli. Veoma je teško napraviti, recimo, kokošiju paštetu, a mi smo recepturu za našu paštetu radili u Briselu. Dotjerali smo je po našem ukusu, pokušali dostići tu aromu o kojoj sam govorio i eto, uspjeli, što je za nas velika stvar. Mi danas dobijamo informaciju sa terena, da je veoma teško pronaći goveđi narezak sa aromom i mirisom kao što je nekada bilo, a mi smo to eto postigli i to je to, pravi mesni narezak."

K.I. - Nije se u početku možda ni očekivalo da će ovako brzo doći priznanja za proizvode koji su, na određeni način, još u probnoj proizvodnji?

"Naravno, mi smo na ocjenu dali dva proizvoda da bi dobili informacije od svjetski priznatih stručnjaka o kvaliteti proizvoda i ispravnosti naših opredjeljenja u proizvodnji, naših vizija i ideja. Probna proizvodnja na ovim prostorima ima pogrešnu percepciju. Nije to ništa nedovršeno niti eksperimentalno, jednostavno, to znači plasirati proizvod na tržište, oslušivati reakciju kupaca, povratne informacije upotrijebiti, ako je potrebno, u doradu i u savršavanje proizvoda kako bi kupci bili zadovoljniji. I s te strane mi smo više nego zadovoljni. Nismo se nadali priznanjima ali kada za naše proizvode dođu priznanja iz zemlje u kojoj se takvi proizvodi deseniama proizvode, onda je to nešto posebno".

K.I. - Javnost i nije baš u najboljoj mjeri informisana o tome šta znači dobiti jedno ovakvo priznanje.

"Uvijek se kod nas sa nekom sumnjom prilazi nagradama i priznanjima. Razumijem takav stav jer jednostavno živimo u vremenu i u zemlji u kojoj je prisutno puno nepravilnosti. Kada je u pitanju sajam u Novom Sadu, u ocjenjivačkom žiriju su svjetski priznati stručnjaci. Uzorci se predaju pod šiframa, dakle, ne znaju ni od koga dolaze ni iz kojeg područja. Tu je jedan sasvim drugi sistem ocjene kvaliteta. Pa delegacija iz naše firme je dobila brojne čestitke na prijemu medalja, ocjenjivački žiri je posebno uputio čestitke za kompletan proces proizvodnje, za konstatnost u kvalitetu, jednostavno, kada su odredili šifre koje će dobiti nagrade, pa kada su šifre nakon toga otvorene, i oni su bili pozitivno iznenađeni što je opet Menprom među najboljima i, u neformalnim razgovorima, izazili su divljenje svemu što radimo i toplo nas preporučuju kao primjer ispravnog puta do kvalitetnog proizvoda".

K.I. - Pozitivna priča našla je odjeku u svim medijima u BiH.

"Raduje da su mediji to prepoznali, što moram priznati



i nije čest slučaj jer se sve, pa čak i ovakve pozitivne priče za Tuzlu, Tuzlanski kantona i općenito Bosnu i Hercegovinu tretiraju komercijalno, ali to je neka druga priča. Tek, zahvaljujemo se medijima koji su u najvećoj mjeri prenijeli informaciju o našem uspjehu, a ta je informacija odjeknula pozitivno u cijeloj zemlji, regionu i što posebno raduje, u cijelom svijetu, gdje god ima naših ljudi. Dolaze naši ljudi u BiH sada na odmor i kupuju naše proizvode. Raduju se, to su informacije sa terena, da i u njihovoj zemlji ima kvalitetnih proizvoda, da imaju kvalitetan domaći brend”.

K.I. - Priznanja su sigurno uticala i na povećanje narudžbi?

”Kako da ne, prepoznalo se to široko u regiji, u cijeloj BiH, i mi danas bilježimo povećanje narudžbi za naše proizvode npr. sa Kosova, recimo da je duplo veća narudžba za naše proizvode nakon ovih medalja”.

K.I. – Temeljem svih priznanja i pohvala, logično je da se zapitamo šta je recept, ne za proizvode to je tajna kuće, nego za uspjeh, šta je to što bi trebali i drugi da slijede?

”Mi konstantno radimo na kvalitetu. Bez svakodnevnog truda i rada, posvećivanja kvalitetu, profesionalizmu, nema rezultata. Mi se ne bavimo lošim poslovnim metodama, ne bavimo se damping cijenama, ne bavimo se varanjem naših kupaca, ne želimo im ponuditi sve i svašta kao što je tu dobrim dijelom slučaj u ovoj zemlji. Nažalost, situacija je takva da kupci u dobroj mjeri posežu za proizvodima sa niskim cijenama i nesvjesno ulaze u veliki rizik kupovine nekvalitetnih proizvoda, prinuđeni su zbog stanja u zemlji. Ipak, kupce ne možete prevariti, znaju šta vrijedi i, kada su prilici, znaju da će kupiti kvalitetan proizvod. S druge strane sve je pred nama i do nas. Mi smo naše brendove Pollo i Premi unaprijedili, iskoristili, prenijeli na Pollo paštetu i Premi narezak. Dakle, jednostavna priča ali smatramo dobra ideja, uostalom, i pokazuje se kao dobra”.

K.I. – Rizici su veliki kada je u pitanju roba sumnjivog porijekla i sumljivih cijena. Kako to riješiti?

”Mora se država pobrinuti za svoju građane. Mora zaštititi domaću proizvodnju na način da se uvedu strožije kontrole svega što ulazi u našu zemlju. Nisam za zatvaranje granica, potrebna je konkurencija svakome. Dobra, zdrava konkurencija može smo doprinijeti poboljšanju naših usluga i proizvoda, ali se mora voditi računa da je od uvoza, mnogo važnije zaštititi domaću proizvodnju na način da je to u istoj mjeri kako su naši proizvodi opterećeni kada izlaze iz naše u druge zemlje. To je što se tiče generalnog stava države, politike itd. ali kada su u pitanju svakodnevna razmišljanja običnog čovjeka, ne

treba ići daleko. Evo naš primjer, ovo je porodična firma, ja imam porodicu, djecu, njima ću ostaviti sve ovo, a svi mi koristimo, jedemo svoje proizvode. Pa kakav bi ja bio čovjek da nekvalitetnu hranu dajem svojoj djeci, da trujem svoju unučad radi zarade. Kupci se sve više informišu o tome ko, šta i kako stoji iza određenih proizvoda i kompanija i ja vjerujem da će doći vrijeme kada će se i kod nas cijeniti isključivo kvalitet. Želim da postavim nove standarde kvaliteta proizvoda u ovoj državi pa i po cijenu smanjenja prodaje, ali za dobro budućih generacija. Želim dobro svojoj i svačijoj djeci i unučadi”.

K.I. – Ne možemo a ne pomenuti poslovni ambijent, pomenuli ste državu, može li i hoće li pomoći?

”Ja ne tražim nikakve podsticaje, ne tražim nikakvu finansijsku pomoć. Samo želim da se u ovoj zemlji stvore uslovi za normalno poslovanje. Za normalan odnos firme i društva. Moram priznati da nisam siguran da mi i nakon ovog teksta u Komorskom informatoru, neće pokucati inspektori na vrata. Jednostavno, otvoreni smo, nudimo sve na uvid, transparentno kako se danas voli reći. Sigurni smo da je kod nas sve u redu, to je ona priča o nasljednicima, o djeci i unucima, kojima ne želim ostaviti ni teret oca i djeda koji nije poštovao propise, ne želim da to nose na leđima i na prezimenu. Radimo ispravno a samo želimo da se nekada u javnosti iz tih silnih inspekcija, izade sa informacijom i o onima koji su ispravni, koji uredno posluju, ispunjavaju sve obaveze, toj istoj inspekciji pune budžete a da istovremeno, oštrije kažnjavaju one koji nisu ispravni, da javnosti predoče informacije o tome ko krši propise ove zemlje i da sve privredni subjekti imaju isti tretman, isti broj kontrola. To je u ovoj zemlji, temeljem dosadašnjih iskustava, vjerovatno utopija, ali ja to želim”.

Ovako je za Komorski informator govorio Mensur Alić direktor i vlasnik MI ”Menprom” Tuzla. Često je u razgovoru pominjao djecu i unučad pa i na kraju iznesimo jednu informaciju vezanu za potomke. Ideja unuka je da uz postojeće dvije fabrike, djed napravi i treću. Zadatak koji je postavio unuk djed je već počeo pripremati. Ideja je tu, razmišljanja dovode do konačnih opredjeljenja do treće fabrike u okviru MI ”Menprom” Tuzla. Biće to pileća klaonica sa svim potrebnim i najmodernijim pratećim sadržajima koji zatvaraju kompletan ciklus proizvodnje pilećeg mesa u koji će biti uključen veliki broj kooperanata. To je plan za naredni period, zadatak unuka....

Pripremio: Dino Kalesić





Sjednica Odbora Sekcije za unutrašnji prijevoz putnika...

MANDAT NOVOM PREDSJEDNIKU SEKCIJE

- *Rasprava o kadrovskim pitanjima, dopisu Federalnog resornog ministra, Pravilniku o kriterijima, postupku i načinu usklađivanja registracije i ovjere redova vožnje i načina vođenja registra –*



Odbor Sekcije za unutrašnji prijevoz putnika, pri Udruženju za promet i komunikacije Kantonalne privredne komore Tuzla, održao je sjednicu u proširenom sazivu. Teme koje je pretpostavljao Dnevni red ovog skupa, okupile su veliki broj predstavnika prevoznčkih firmi sa područja kantona. Uvijek je najzanimljivija tema koja se tiče kadrovske politike, pa je upravo to bila i prva tačka Dnevnog reda sjednice. Birao se predsjednik sekcije. Bila su dva kandidata, aktuelni Sulejman Alibašić i novi kandidat Bajro Halilčević. Članovi Sekcije žele promjene pa je povjerenje ukazano Bajri Halilčeviću koji predstavlja firmu „Road“ doo. Nedret Kikanović predsjednik Komore je potom upoznao članove Sekcije sa dopisom Federalnog ministarstva prometa i komunikacija. Istakao je da je produžena važnost privremeno obustavljenom održavanju polaska ili voznog reda i privremeno registriranih voznih redova, do 31.8.2013.godine, jer uvjeti izvanrednog slučaja ili više sile nisu prestali. Dnevni red je predvidio i

upoznavanje sa inicijativom grupe prevoznika a sve vezano za izradu daljinaara na području Kantona, izmještanje prigradskih stanica u Tuzli, aktivnosti u vezi Pravilnika o kriterijima, postupku i načinu usklađivanja registracije i ovjere redova vožnje i načina vođenja registra. Brojni diskutanti, zanimljiva rasprava, korisni prijedlozi, uputili su na određene zaključke. Između ostalog, zaključeno je da se uputi dopis resornom kantonalnom ministarstvu u kojem se predlaže da se kantonalno ministarstvo zajedno sa Sekcijom za unutrašnji promet putnika Kantonalne privredne komore Tuzla preko lokalnih zajednica i dominantnim prijevoznikom sa te zajednice uključe u izradu daljinaara na području Tuzlanskog kantona, jer je izrada daljinaara i usklađivanje predviđeno na federalnom nivou u septembru mjesecu. Razlog uključivanja ovih subjekata je da se izbjegnu problemi koji bi nastali njihovim ne uključenjem, jer će se daljinari u svakom slučaju uraditi u septembru od strane federalnog ministarstva. Dalje, svi članovi Sekcije treba da dostave svoje prijedloge Kantonalnoj privrednoj komori Tuzla kako bi Stručna služba Komore sve prijedloge objedinila i dostavila kantonalnom i federalnom ministarstvu, općinskom vijeću Tuzla i obrađivaču odluke - Služba za komunalne djelatnosti Općine Tuzla te da se na slijedeću sjednicu pozovu predstavnici ministarstva, Službe za komunalne djelatnosti Općine Tuzla i Kantonalne privredne komore Tuzla, sve vezano za Pravilnik o kriterijima, postupku i načinu usklađivanja registracije i ovjere redova vožnje i načina vođenja registra. Članovi Sekcije upoznati su da Kantonalna privredna komora Tuzla nije dobila Nacrt Pravilnika o kriterijima, postupku i načinu usklađivanja registracije i ovjere redova vožnje i načina vođenja registra, pa samim tim nije ni mogla voditi aktivnosti vezano za Pravilnik. Takođe, donesen je zaključak da se uputi dopis resornom ministarstvu u kome se traži da se Nacrt Pravilnika dostavi Komori, kako bi se krenulo sa aktivnostima. Bilo je i prijedloga koji nisu mogli biti usvojeni, kao što je slučaj sa prijedlogom vezanim za izmjene i dopune Zakona o unutrašnjem cestovnom prometu na području Tuzlanskog kantona. Ovdje je riječ o Federalnom a ne kantonalnom Zakonu, dakle, u nadležnosti Federacije Bosne i Hercegovine. Članovi Sekcij za unutrašnji promet putnika zaključili su da je potrebno uputiti dopis Federalnom ministarstvu u kojem se traži objašnjenje pojma „međumjesni saobraćaj, avionski i željeznički saobraćaj“ a koji se odnosi na plaćanje svake prodate karte u mjesecu oktobru za „dječiju nedelju i crveni križ“. Donesen je zaključak da se uputi dopis Vladi TK i resornom ministarstvu u kojem se traži obrazloženje donesene Odluke o subvencionisanju prijevoza učenika srednjih škola i studenata za razdaljinu preko 4 km, jer se ista treba primjeniti retroaktivno za april, maj i juni. Prevoznici su već izvršili fakturisanje tako da imaju veliki problem oko subvencije. Takođe, kada se već upućuje dopis Vladi treba to iskoristiti i navesti što više stvari koje traže rješenje, pa će se u istom dopisu tražiti od Vlade TK da izvrši i subvenciju za novembar i decembar 2012. godine, jer po ovoj Odluci ti su mjeseci ispušteni. Bilo je rasprava u kojima se često pominjalo i Ministarstvo unutrašnji poslova a rasprava je na kraju završena zaključkom da se uputi dopis MUP- TK Tuzla u kojem se traži urgencija odgovora po dopisu iz aprila mjeseca vezano za primjenu i poštivanje Zakona o osnovama bezbjednosti saobraćaja na putevima u BiH, a prije svega na član 9. tačka 68.

D.K.



Promjene i novosti iz firme

"VATROSTALAC" doo TUZLA

-Promijenjeni naziv, sjedište, telefonski brojevi-



Iz firme "Vatrostalac inženjering" d.o.o. Tuzla obavještavaju svoje poslovne partnere da su nedavno promijenili naziv, sjedište, telefonske brojeve. Danas firma nosi naziv "Vatrostalac" d.o.o. Tuzla, nalazi se na adresi Bosne Srebrene bb (SKPC Mejdan), 75000 Tuzla, broj telefona je +387/ 35/369-000, broj faksa +387/35/369-001, e-mail je info@vatrostalac.ba a više podataka o firmi nalazi se na službenoj web stranici firme www.vatrostalac.ba. Pored navedenih podataka, novosti u firmi se odnose i na proširenje asortimana usluga. „**Nakon što smo dobili odgovarajuće licence za izvođenje specijalističkih radova, te za projektovanje (konstruktivna faza) na nivou Federacije BiH i Republike Srpske, u mogućnosti smo ponuditi usluge projektovanja, izvođenja i stručnog nadzora nad građevinskim radovima kod izvođenja novih, te sanacije i konstruktivnog ojačanja postojećih konstrukcija, naročito u području industrijskih objekata (dimnjaci, rashladni tornjevi, proizvodni pogoni i sl.). Djelatnost firme je proširena i na područje ispitivanja kvalitete ugrađenih materijala u postojeće konstrukcije (beton, armatura, čelik, opeka, itd.), te na ispitivanje svih tipova konstrukcija i konstruktivnih elemenata probnim statičkim i dinamičkim opterećenjima (mostovi, sportske tribine, krovni nosači, kranske grede, temeljne konstrukcije mašinske opreme koja izaziva vibracije, industrijski dimnjaci, silosi, rezervoari, svi tipovi objekata visokogradnje, međuspratne**



konstrukcije i sl.). Radove izvodi inženjerski tim sa dugogodišnjim iskustvom iz područja ispitivanja, sanacije i ojačanja konstrukcija. Sva ispitivanja provodimo primjenom savremene specijalističke opreme (induktivni davači pomjeranja, akcelerometri, mjerne trake za sve tipove materijala, inklinometri). Sa navedenom opremom u mogućnosti smo da vršimo mjerenja ugiba i pomjeranja, vibracija, frekvencija i perioda oscilovanja, deformacija i naponskih stanja, dinamičkih koeficijenata, uglova zaokretanja i popustljivosti spojeva, itd.“, rekao je za „Komorski informator“ Fuad Mujkić direktor firme.

Kako je istakao za komorski list, primjenom navedene opreme stvorene su mogućnosti za izvođenje ispitivanja konstrukcija bez apliciranja probnog opterećenja na konstrukciju, što podrazumjeva mjerenje ponašanja konstrukcije u eksploataciji usljed neprekidnog djelovanja okoliša kao dinamičke pobude (mjerenje ambijentalnih vibracija konstrukcije). Pri ovom ispitivanju omogućeno je investitoru kontinuirano korištenje objekta bez zastoja u toku ispitivanja, odnosno dinamička svojstva objekta se mogu utvrditi bez ometanja njegovih korisnika, kao i bez oštećenja konstrukcije. Moguća je i usporedba promjena stanja konstrukcije (pojačanje, oslabljenje) između dva mjerenja, što je značajno za ocjenu uspješnosti izvođenja sanacionih radova i radova na ojačanju konstrukcije. Za detaljnije upoznavanje sa poslovnim programom firme "Vatrostalac" d.o.o. Tuzla, napravljena je prezentacija koju je moguće pogledati na web stranici Komore, www.kpktz.ba.

D.K.



Sjednica Odbora Udruženja za poljoprivredu...

NEOPHODNE PROMJENE U PROGRAMU PODRŠKE

- Rasprava o Programu utroška sredstava za novčane podrške u primarnoj poljoprivrednoj proizvodnji TK-a u 2013. godini -

Odbor Udruženja za poljoprivredu i prehrambenu industriju Kantonalne privredne komore Tuzla, održao je 7. Sjednicu u proširenom sazivu. I ovoj sjednici, u skladu sa jedinom tačkom Dnevnog reda a reklo bi se i po ustaljenoj praksi u posljednje vrijeme, prisustvovali predstavnici Ministarstva za poljoprivredu, šumarstvo i vodoprivredu Tuzlanskog kantona te Poljoprivrednog zavoda Tuzla. Raspravljalo se o već dugo najaktuelnijoj temi u poljoprivredi, Programu utroška sredstava za novčane podrške u primarnoj poljoprivrednoj proizvodnji TK-a u 2013. godini. Uvodne napomene o pomenutom Programu dao je Senad Hećimović, predsjednik Odbora ovog komorskog Udruženja. Predsjednici grupacija koje su formirane u okviru Udruženja dali su svoja viđenja ovog dokumenta i kroz raspravu iznijeli određene primjedbe te dali i prijedloge za unaprjeđenje Programa. S tim u vezi, zaključeno je da se zahtijeva poštivanje zakonske odredbe o visini budžetskih sredstava od 3,5% od prihoda kantonalnog budžeta za novčane podrške primarnoj poljoprivrednoj proizvodnji, te da se na prvom rebalansu budžeta ispoštuje Zakon o novčanoj podršci u primarnoj poljoprivrednoj proizvodnji (5/07).



"Članovi ovog udruženja smatraju da se u Program treba uvrstiti novčana podrška za proizvodnju kukuruza: silažni kukuruz od 1 do 2 ha i kukuruz za zrno od jedan ha i više u iznosu kao i u programu FBiH novčanih podrški za silažni kukuruz 600,00 KM/ha. Također, smatramo da je potrebno u Program uvrstiti novčanu podršku za proizvodnju stočne krmne hrane- travne sjenaze (od strnih žita, dts-a, zasijanih i prirodnih livada) u iznosu od 300,00KM/ha, u cilju postizanja ekonomski održive proizvodnje u govedarstvu, kao i podrška za vještačku oplodnju krava u iznosu kao što je bila i u prošlim godinama tj. 7KM /po plotkinji, kao jedna od najznačajnijih mjera u selekciji proizvodnih karakteristika goveda. Potrebno je da Program sadrži novčane podrške za podizanje zasada krošnjastog voća od 0,2-0,5 ha u iznosu 500,00 KM/dul (za jabuku i krušku) i 350,00 KM/dul (za šljivu), Otkup voća za dalju prodaju tj. da se umjesto "najmanje 400 t voća" navede – najmanje 150 t voća, te bi tako više otkupljivaca voća pokrili cijelo područje TK-a te da se izbalansiraju količine voća koje se podstiču i koje se otkupljuju za dalju prodaju i preradu, te da se u odnosu na prošlu godinu srazmjerno povećaju novčane podrške za proizvođače i otkupljivace voća, odnosno prednost u povećanju novčanih podrški dati proizvodnji voća. Kada su u pitanju proizvođači gljive, umjesto "najviše 45 t", u Programu treba navesti – najviše 500 t, te bi tako naši proizvođači gljive ostali konkurentni na tržištu. Zbog nemogućnosti ispunjavanja uslova za dobijanje novčane podrške iz FBiH, naši gljivari su na granici rentabilnosti proizvodnje", rekao je o ishodu ovog skupa Senad Hećimović predsjednik Odbora Udruženja.

Poljoprivrednici okupljeni u komorsko Udruženje smatraju da je u Programu neophodno napraviti izmjenu unovčanoj podršci za kapitalna ulaganja tj. da minimalan iznos investiranja iznosi 3.000,00 KM a ne 10.000,00KM kako je to predviđeno, jer su mogućnosti investiranja poljoprivrednika veoma umanjene. Zaključci doneseni na sastanku upućuju na izmjene u Programu vezane za novčane podrške organizatorima proizvodnje u kooperaciji otkupa proizvoda iz kooperacije i prodaja tih proizvoda, za proizvodnju i industrijsku preradu kornišona, za registrovane klaonice peradi. Bila je ovo prilika da se još jednom istakne težak položaj poljoprivrednih proizvođača na području Tuzlanskog kantona u koji su dovedeni neredovnim isplata redovnih podsticaja za prošlu godinu te dijelom lošim vremenskim prilikama u prošloj i ovoj godini. Senad Hećimović predsjednik Odbora Udruženja, istakao je da i ova rasprava dolazi prilično kasno. U periodu kada je više od pola godine prošlo, tek raspravljati o Programu za ovu godinu prilično je neozbiljno i neodgovorno, dodao je i rekao i ovom prilikom da je najveći problem u tome što Vlada nije realizovala Odluku o isplati 3,5% od Budžeta. Naglasio je da su na terenu evidentne posljedice ovakvog stanja koje je dodatno opterećeno novim carinskim odnosima sa Hrvatskom nakon ulaska susjeda u Evropsku uniju. Situacija je teška, ozbiljna i ukoliko se ne dođe do kvalitetnih rješenja, može kulminirati velikim protestima i potpunom blokadom Tuzlanskog kantona, izjavio je predsjednik Hećimović.

D.K.



30 godina proizvodnje povrća

ZNAČAJAN JUBILEJ ZZ "GRAČANKA"

- Kontinuiran rad na uvođenju novih tehnologija i evropskih standarda u poljoprivrednoj proizvodnji -



Zemljoradnička zadruga "Gračanka" davno je prešla opštinske i entitetske granice i već uveliko sa svojim kooperantima radi na certificiranoj proizvodnji zdrave hrane. ZZ "Gračanka" i ove godine, kao i prethodnih, ostaje glavni nositelj svih aktivnosti u oblasti poljoprivredne proizvodnje. I ove godine "Gračanka" će organizovati veliku proizvodnju sa velikim brojem svojih kooperanata prateći ih u svim segmentima proizvodnje, od sijanja do plasmana gotovih proizvoda. Ove godine će imati na raspolaganju i vlastitu hladnjaču kapaciteta 300 tona i višestruko uvećan plasman poljoprivrednih proizvoda, naročito šljive, na tržište zemalja Evropske unije. Inače, Zemljoradnička zadruga "Gračanka" ove godine slavi značajan jubilej, 30 godine proizvodnje povrća uglavnom za industrijsku preradu, a dijelom i za svježju potrošnju. Vrlo važan artikal koji zauzima preko 50% njihove proizvodnje je krastavac kornišon koji su, uz ostalo povrće, prodavali na domaćem tržištu. Zemljoradnička zadruga osnovana je 1954. godine, pod nazivom "Bratstvo" i imala je niz transformacija. Danas posluje pod imenom Z.Z. "Gračanka". Godišnje zadruga, čia je djelatnost

proizvodnja voća i povrća, proizvede i plasira 1650 tona voća i povrća, navodi u tekstu o ovoj firmi portal eKapija.ba. Proizvodnja povrća se bazira na korištenju hibrida sjemena od vodećih svjetskih kuća gdje se koriste najkvalitetniji hibridi. Za svoje proizvođače organizuje stručna predavanja u cilju uvođenja novih tehnologija u proizvodnji povrća i voća.

Z.Z. "Gračanka" godišnje proizvede i otkupi tri miliona litara mlijeka. Otkup mlijeka se vrši na dvije Opštine Gračanica i Doboj Istok. Otkup mlijeka je organizovan kroz 22 otkupne stanice. Svakodnevno sa svojim kooperantima rade na uvođenju novih tehnologija u proizvodnji mlijeka, izradi projekata za proizvođače mlijeka, nabavci kvalitetnog priplodnog materijala iz Austrije i Njemačke, širenju stočarskih farmi, širenju mreže otkupa mlijeka. Svoje kooperante – farmere Z.Z. Gračanka snadbjeva svim potrebnim repromaterijalom. Svi prodajni objekti su snadbjeveni repromaterijalom od poznatih svjetskih kuća koje bira stručna služba Z.Z. Gračanka, tako da je u Poljoprivrednim apotekama zastupljeno sve što je potrebno poljoprivrednicima od repromaterijala, stočne hrane, mineralnih đubriva, zaštitnih sredstava. Zadruga ima 203 zadrugara i 1150 kooperenta. Svoju djelatnost realizuje na 7 opština. Od 2004. godine rad zadruga je usaglašen sa opštim zakonom o zadrugama BiH. Z.Z. "Gračanka" ima 20 zaposlenih od toga 6 poljoprivrednih inženjera i 9 poljoprivrednih tehničara a raspolaže sa 10 građevinskih objekata u vlasništvu zadruga. Menadžment zadruga čine stručni ljudi koji su privrženi poljoprivredi i zadrugarstvu. Cijeli tim je prošao specijalističko obrazovanje iz raznih oblasti poljoprivrede, kako u zemlji tako i u inostranstvu. Cilj menadžmenta je kontinuiran rad na uvođenju novih tehnologija i evropskih standarda u poljoprivrednoj proizvodnji.



Z.Z. Gračanka
Gračanica



Vlada Tuzlanskog kantona i privreda

PREMIJER TK POSJETIO ELEKTRO-AGENT**- Otvorena vrata za plasman proizvoda preduzeća Elektro-agent-**

Omogućiti konkurentnost proizvodima lokalne firme i skrenuti pažnju javnosti na jedno od preduzeća koje nije u fokusu interesovanja, i pored uspjeha koje postiže, bio je motiv posjete premijera Tuzlanskog kantona Seada Čauševića i federalnog ministra saobraćaja i komunikacija Envera Bijedića Elektro-Agentu d.o.o. Riječ je o u preduzeću u privatnom vlasništvu u čijih 7 pogona 60 uposlenika proizvodi 700 različitih proizvoda. Za dio proizvodnog asortimana poput odbojnika i šaftova interes je pokazao resorni federalni ministar Bijedić najavivši, projatno iznenađen viđenim, i buduću saradnju Ministarstva sa Elektro-Agentom. „Spremni smo otvoriti razgovore vezano za sve proizvode iz oblasti putne infrastrukture koje nam ovo preduzeće može ponuditi i kojem za proširenje kapaciteta treba podrška velikih sistema sa područja Kantona“, kazao je premijer Čaušević ukazujući na potrebu medijske podrške firmama poput Elektro-Agenta, saopćeno je iz Odjeljenja za informisanje Vlade Tuzlanskog kantona.

**Posjeta privrednim subjektima u Tuzli**

U sklopu AFTERCARE programa za 2013. godinu, predstavnici Agencije za unapređenje stranih investicija u BiH (FIPA), Općine Tuzla i Ministarstva razvoja i poduzetništva Tuzlanskog kantona su godine posjetili nekoliko privrednih subjekata sa područja općine Tuzla. Privredni subjekti koji su ovoga puta bili obuhvaćeni posjetama su kompanije sa elementima stranog ulaganja Xella BH d.o.o. Tuzla koja je članica velike međunarodne kompanije iz Njemačke Xella International i od 2009. godine proizvodi i prodaje građevinski materijal pod nazivom YTONG na području Bosne i Hercegovine, te Earth Tec d.o.o. Tuzla koja čini dio Earth Tec Grupacije iz Italije i bavi se proizvodnjom metalnih konstrukcija i obnovljivim izvorima energije. Pored navedenih posjeta kompanijama koje sadrže elemente stranog ulaganja, obavljen je razgovor i sa predstavnicima Razvojno poduzetničkog centra – Inkubator Lipnica koji predstavlja kvalitetan instrument podrške za tek osnovana preduzeća kojima je ta podrška potrebna radi opstanka, kao i postojećim preduzećima koja se po povoljnijim uslovima, do određene faze, mogu razvijati u RPC-u. Također, održan je sastanak i sa predstavnikom kompanije Uni Bristol d.o.o. Tuzla koja ulaže oko 100 miliona eura u izgradnju kompleksa „Mellain“, a što predstavlja jednu od najvećih investicija u posljednjih desetak godina u Tuzli. Sa predstavnicima navedenih kompanija razgovarano je o iskustvima poslovanja u Bosni i Hercegovini, preprekama i problemima na koje su nailazili u poslovanju te planovima za budućnost i za daljna širenja poslovanja. Kao i dosadašnje posjete i ova je realizirana kroz saradničku mrežu za postinvesticionu podršku stranim investitorima u BiH koja je predviđena ugovorom o saradnji između Vijeća ministara BiH i Međunarodne finansijske korporacije (IFC) na projektu poboljšanja poslovnog okruženja u BiH, a koju čine Agencija za unapređenje stranih investicija u BiH (FIPA) kao koordinator aktivnosti, nadležne institucije FBiH, kantona i općina, stoji u saopćenju Odjeljenja za informisanje Vlade Tuzlanskog kantona.

POTPISAN UGOVOR O KONCESIJI ZA KORIŠTENJE PRIRODNE MINERALNE VODE

Ugovor o koncesiji za eksploataciju prirodne mineralne vode na eksploatacionom polju „Ljubače“ su u prostorijama „Pivare“ dd Tuzla potpisali ministar industrije, energetike i rudarstva Željko Knežiček i direktor „Pivare“ Zlatan Pejić. Koncesija za eksploataciju mineralne vode dodijeljena je na period od 5 godina, a prije zaključivanja ugovora Pivara je Ministarstvu dostavila bankovnu garanciju na iznos od 56.700,00 KM kao garanciju redovnog izmirenja obaveza po osnovu koncesione naknade. „Prema zadnjim informacijama koje sam dobio, moram istaći da je tuzlanska pivara, jedan od svijetlih primjera društveno odgovorne kompanije, koja je po osnovu koncesionih naknada, u pretplati prema Tuzlanskom kantonu, odnosno da su izmirili sve obaveze iz prethodnog ugovora te unaprijed uplatiti jedan dio svojih budućih obaveza“ istakao je ovom prilikom ministar Knežiček, te još jednom podsjetio da 80% ovih sredstava pripada, u ovom slučaju Općini Tuzla, a 20% će Ministarstvo usmjeriti u nova istraživanja ležišta na području našeg kantona. „Tuzlanski kiseljak je prirodna mineralna voda bogata magnezijem i drugim mineralima i mikroelementima, te je zbog toga najpogodniji način unošenja potrebnih količina magnezija u organizam“, rekao je direktor Pejić, te dodao da kupovinom domaćih proizvoda ne samo da jačamo domaću privredu i održavamo postojeća radna mjesta, nego istovremeno investiramo u domaće školstvo, zdravstvo i druge javne usluge.

Zaustaviti rad na crno...

SASTANAK U RESORNOM MINISTARSTVU

- Posebnu pažnju posvetiti sprječavanju rada na crno u oblasti prijevoza-



Inspektori za cestovni saobraćaj i službenici policije će i u narednom periodu nastaviti sa aktivnim provođenjem Operativnog plana mjera za suzbijanje nelegalnog rada u oblasti prijevoza na području Tuzlanskog kantona, a prioritet i fokus kontrole će biti usmjeren prema radu bez odobrenja tzv. „rad na crno“, zaključeno je, između ostalog, na jučer održanom sastanku predstavnika nosilaca aktivnosti predviđenih Operativnim planom. Također, zaključeno je i da pri kontroli obavljanja prijevoza na području našeg kantona, posebnu pažnju treba obratiti na povratnike u činjenju prekršaja i rada na crno. Ovim osobama treba podnositi prekršajne naloge i prijave, donositi rješenja o zabrani rada i stavljaju „kandže na vozila“, kako bi bili primjer za druge prekršitelje i prestali sa nelegalnim radom, istaknuto je jučer. U narednom periodu Ministarstvo trgovine, turizma i saobraćaja će, između ostalog, od svih općina na području TK tražiti da, u skladu sa Zakonom o cestovnom prijevozu na području TK, na vrijeme dostave Plan razmještaja i broj taksi stajališta, te broj stajališnih mjesta na taksi stajalištima koja se nalaze na javnim površinama za 2014. godinu na saglasnost ministarstvu, kao i da nadležne općinske službe urede taksi stajališta, odnosno da ih obilježe vertikalnom i horizontalnom saobraćajnom signalizacijom. Učesnici sastanka složili su se i da je potrebno medijski promovirati korištenje usluga legalnih prijevoznika koji svojim radom ispunjavaju obaveze svoje obaveze, odnosno uplaćuju poreze i doprinose iz kojih se finansiraju zdravstvo, školstvo, policija i dr. Osim Nenada Lukanovića, Pomoćnika Ministra za saobraćaj, današnjem sastanku su prisustvovali predstavnici Kantonalne uprave za inspekcijske poslove, Ministarstva unutrašnjih poslova TK, udruženja „Tuzla-Taxi“ Tuzla, Samostalnog sindikata saobraćaja i veza FBiH – Sindikata saobraćaja i veza TK, Kantonalne privredne komore odnosno Udruženja za promet i komunikacije – Sekcija za promet putnika, te predstavnici preduzeća D.O.O. „ROAD“ Lukavac, D.O.O. „BJELJEVACTOURS“ Kalesija, D.O.O. „LITVATRANS“ Banovići, D.O.O. „INTEGRAL“ Kladanj, D.O.O. „SREBRENİK TRANS“ Srebrenik, D.O.O. „BRACA M“ Srebrenik i D.D. „TRANSTURIST“ Tuzla, saopćeno je iz Odjeljenja za informisanje Vlade Tuzlanskog kantona.

- Vlada o Direkciji cesta



Utvrđen nacrt Zakona o osnivanju JU Direkcija regionalnih cesta TK

Vlada Tuzlanskog kantona utvrdila je danas Nacrt Zakona o osnivanju javne ustanove Direkcija regionalnih cesta Tuzlanskog kantona. Ovim zakonom osniva se Direkcija regionalnih cesta Tuzlanskog kantona, uređuje njen status i pravni položaj, djelatnost i financiranje, te regulira upravljanje i rukovođenje, vršenje nadzora i druga pitanja vezana za rad Direkcije. U svom radu ova institucija će upravljati, graditi, rekonstruisati, održavati i baviti se zaštitom regionalnih cesta na području našeg kantona, saopćeno je iz Odjeljenja za informisanje Vlade Tuzlanskog kantona.

- Otvorena uređena dionica puta „Kreka“ – „Siporex“

Dionicu puta od bolnice „Kreka“ do raskrsnice kod Siporexa su svečano u promet pustili premijer Tuzlanskog kantona Sead Čaušević i federalni ministar saobraćaja i komunikacija Enver Bijedić. „Radi se o dionici koja služi za rasterećenje saobraćaja na ulazu u Tuzlu a dio je ukupnih aktivnosti koje Federalno ministarstvo saobraćaja i komunikacija radi na području Tuzlanskog kantona“, rekao je ovom prilikom premijer Čaušević i dodao da očekuje i nastavak radova na izgradnji modernog puta na zapadnom ulazu u Tuzlu. Govoreći o radovima na izgradnji dionice puta od petlje Šićki Brod do bolnice Kreka čija vrijednost iznosi oko 10 miliona KM federalni ministar Bijedić najavio je i projekat takozvane južne obilaznice grada Tuzle, saopćeno je iz Odjeljenja za informisanje Vlade Tuzlanskog kantona.



Unaprijeđena hotelska usluga...

„TEHNOGRAD“ – HOTEL SA 3 ZVJEZDICE

- Nova kategorija od 1. jula - Veoma povoljni uvjeti i cijene -

Hotel Tehnograd od prvog dana jula zasluženoi nosi kategoriju „HOTEL SA 3 ZVJEZDICE. Razlog je to da se javnosti prezentira novu ponuda Hotela, pružanje usluga smještaja i ishrane u HOTELU „TEHNOGRAD“ Tuzla, smještenom u ulici Ž.Vukovića bb – Slavinovići – Tuzla, udaljenog od Panonskih jezera 1 km. Iz „Tehnogrda“ nude povoljne uvjete i povoljne cijene. Hotel raspolaže sa 10 jednokrevetnih soba, 30 dvokrevetnih soba, 4 dvokrevetne sobe sa francuskim lezajem, 20 dvokrevetnih ssoba + pomoćni krevet i 2 delux apartmana.

Jednokrevetne sobe su po veoma popularnoj cijeni od 35KM, dvokrevetno po 55KM, dvokrevetne sa pomoćnim krevetom po cijeni od 70KM. U ponudi je i doručak po cijeni od 5KM po osobi a usluga polupansiona je 50KM dok puni pansion iznosi 60KM po danu bez uključenja boravišne takse. Za veći broj gostiju, dakle, za organizovane posjete aranžmani su po dodatnom popustu. Za sve dogovore i uspostavljanje saradnje Uprava hotela je dostupna na telefone s brojevima 00387 35 226 810 i 226 396, fax: 00387 35 226 810, mobitel: 061/441-321 direktor i mobitel: 061/430-372 zamjenik direktora. Više informacija na službenoj web stranici: www.hotel-tehnograd.com.



POČINJE INSTRUKTIVNI PRIPREMNI SEMINAR ZA POLAGANJE PRAVOSUDNOG ISPITA

Kantonalna privredna komora Tuzla u saradnji sa sa Federalnim ministarstvom pravde Bosne i Hercegovine i Ministarstvom pravosuđa i uprave Tuzlanskog kantona organizuje Instruktivni pripremni seminar za polaganje pravosudnog ispita. Cilj seminara je da se diplomiranim pravnicima koji ispunjavaju zakonom propisane uvjete za polaganje Pravosudnog ispita omogući da steknu dodatna znanja i praktična iskustva od strane predavača iz pojedinih pravnih oblasti, imenovanih od strane Federalnog ministarstva pravde, te time olakšaju pripremu za izlazak na ispit. Seminar traje 120 časova a obuhvata problematiku iz svih stručnih predmeta koji su predviđeni programom za polaganje pravosudnog ispita. Predavači su eksperti iz pojedinih oblasti. Seminar će se obavljati

u velikoj sali Kantonalne privredne komore Tuzla a počinje u subotu, 24. avgusta 2013. godine. Još uvijek je moguće prijaviti se za seminar pa se pozivaju zainteresovani da popunjenju prijavu koja se nalazi na www.kpktz.ba pošalju na fax: 258-271 ili e-mail; komora@kpktz.ba. Kontakt osoba Milica Vujec.



KANTONALNA
PRIVREDNA
KOMORA TUZLA

POSLOVNO- PRIVREDNI REGISTAR KANTONALNE PRIVREDNE KOMORE TUZLA

Kantonalna privredna komora Tuzla uz tehničku podršku firme „Miavision“ doo Tuzla, izrađuje Poslovno-privredni registar Tuzlanskog kantona, koji će biti objavljen na internet stranici www.kpktz.ba i biće dostupan svima. Cilj projekta je da se na jednom mjestu objedine sve informacije vezane za poslovno – privredne subjekte koji djeluju na području Tuzlanskog kantona. Registar trenutno raspolaže osnovnim informacijama: naziv, adresa, šifra i opis djelatnosti prema klasifikaciji djelatnosti BiH, kontakt osobu i broj telefona. Kako bi registar bio kompletniji, mole se sve firme da dostave sljedeće podatke: - kratak opis (primarna djelatnost, maksimalno 500 znakova) - broj uposlenih - web stranicu - e-mail adresu - logo (min.dimenzija 200px širine)- jedna fotografija (dimenzija minimalno 200x150 ili većih dimenzija). Tražene podatke možete poslati na e-mail edina@kpktz.ba. Za sva dodatna pitanja, kontaktirajte nas putem e-mail ili na broj telefona 035/258-260. Kontakt osoba Edina Kurtić.



Predstavljamo nove članice Komore...

SALON LJEPOTI I ZDAVLJA „BELLADONA“ TUZLA


- *Holistički pristup, bazirano na kineskoj medicini, sklad između duha i tijela -*



„Volim Tuzlu, volim Bosnu, volim čovjeka. Želim pomoći ljudima da poprave kvalitet života u ova turobna i teška vremena!“ Ovako je započeo razgovor u Salonu ljepote i zdravlja Belladona, sa vlasnicom dr. Indicom Karamujić. Da zaista voli ljude uvjerali smo se od prve minute razgovora koji je iniciralo učlanjenje ovog salona u Kantonalnu privrednu komoru Tuzla, baš na insistiranje dr. Karamujić. I zaista, „Belladona“ je prava oaza novih izvora energije, opuštanja i relaksacije kako za žene tako i muškarce, sve na jednom mjestu. Savršeno je mjesto za opuštanje nakon napornog dana ili sedmice, znaju to brojni klijenti još od 1997. godine. **„Holistički pristup u primjeni tretmana te individualni pristup u odabiru tretmana, okrijepit će vam dušu i tijelo. Bogatstvo ponude tretmana kojima salon ljepote „Belladona“ obiluje, zadovoljit će potrebe čak i kod onih najzahtjevnijih, bilo da se radi o otklanjanju napetosti i stresa kroz više od deset različitih vrsta masaža, njezi lica i tijela kroz niz specijalističkih tretmana, otklanjanjem tegoba kroz aromaterapiju. Njega tijela, relaksacija i rekreacija su imperativi današnjice stresnog i urbanog života kojeg vodimo zato smo mi u Belladoni i stavili sebi za cilj pomoći klijentima da se opuste i pripreme za novi radni dan. U svojim prostorima nudimo ugodne trenutke opuštanja i zaborava briga svakodnevnice koje utječu na vaše svakodnevno zdravlje. Terapija se bazira na kineskoj medicini na skladu između duha i tijela. Poznato je da skoro sva oboljenja nastaju zbog nesrazmjera između unutrašnje energije čovjeka, tzv. Odbambene moći i vanjskog faktora“,** istakla je Indira Karamujić, internista kardiolog, akupunkturolog, ultrasoničar.

Stvoren je u ovom udobnom okruženju jedan veoma ugodan ambijent za druženje i opuštanje kroz aromaterapije, elektroakupunkturu, njegu lica i tijela, manuelne masaže i niz drugih usluga. Sve je pod stručnim vodstvom prim. dr. Indire Karamujić koja za saradnice u „Belladoni“ ima školovane terapeutkinje s radnim iskustvom, senzibilitetom i ljubavlju za posao koji su izabrali. „Vrhunsko, kvalitetno, profesionalno, veoma sposobno osoblje puno ljubavi“, ocijenila ih je dr. Karamujić.

„Ljubav je najvažnija. Mi sa puno ljubavi pristupamo onome što radimo, nudimo širok spektar usluga, savjeta, razgovor i dogovor koji uz našu stručnost također u velikoj mjeri doprinosti poboljšanju načina života naših pacijenata što je u konačnici naš cilj“, dodala je dr. Karamujić. Salon Belladona ide u korak sa modernim i savremenim tehnologijama, tako da svi klijenti koji čekaju na svoj



zakazani tretman mogu slobodno koristiti besplatnu WI-FI mrežu. Salon je opremljen najmodernijom opremom kao što je aparat za elektroakupunkturu Bimed 999S koji je u SAD dobio zlatnu medalju za najbolju dijagnostiku i terapiju, veoma efikasan u smanjenju tjelesne težine. Tu su i najmoderniji uređaji za UZ srca i color doppler, abdomena i bubrega. Sve najsavremenije što je potrebno za tretman refleksoterapije, pedikira, manikira, elektroakupunkturu, tretmana lica, aromaterapije tijela, mineralno vitaminski test, anticelulitni tretman, tretmane lica, solarij, akupunktura (bez igle), jacuzzi, sauna kao i internistički pregledi i savjeti (ultrazvuk srca, ekg...). Sve potrebne informacije klijenti mogu pronaći na internet stranici www.belladona-tuzla.com ili putem facebook-a. Salonon Belladona je odnedavno i na novoj lokaciji u naselju Stupine B-7.

D.K

CPA d.o.o. - vodeći proizvođač komercijalne ambalaže u BiH



www.cpa.ba

mail: info@cpa.ba tel: +387 35 635 095



GRAFIČKA PRIPREMA

SAVREMENA TEHNOLOŠKA I INFORMACIONA DOSTIGNUĆA



OFFSET ŠTAMPA



PROIZVODNJA REGISTRATORA

Ambalaža za automobilsku industriju

Ambalaža za prehrambenu industriju

Ambalaža za konditorsku industriju

Ambalaža za farmaceutsku industriju

Ambalaža za kozmetičku industriju

Ambalaža za duhansku industriju

